

Hesch no Zyt?

Ghörsch no, wenn früe der Daag verwacht,
wie d Vögel d Flöötli stimme?
Wies reiner döönt, bis d Sunne lacht,
eis Jublen ischs und Singe.

Hesch au scho gloost, wies Bächli ruscht,
wies bletscheret und glüggslet?
Hesch scho bim näbedure goo
chly in e Blüete güggslet?

Ghörsch no, wie zoobe d Grille gyygt
wenns dunklet über d Matte,
wenn mit eme milden Obeluft
d Nacht löscht die letschte Schatte?

Gsehsch no im Pfauenaug si Chleid,
wies der Wind vo Blüte zue Blüete dreit,
vo der Lilie zue der Roose?

Es isch e Hand woos schafft und schänkt
und mit vill Liebi an eus dänkt,
aber gsee mueschs halt und loose!

E.M.